

摘藻堂四庫全書薈要

集部

欽定四庫全書薈要卷一萬四千七百九十九

集部

丹淵集卷十一

宋 文同 撰

詩五十四首

二年陵陽不見中秋月

陵陽亂山中陰霽日夕發晴光尚希見況復求夜月二年逢中秋曾不識皎潔煙雲爾何事常此作蓬勃纔令薄中明已遣濃處沒羣邪利幽暗左右覺窻窄清光若

蒙蔽誰為我磨拂庭下倚高株露華霑鬢髮

夜聲

秋風動衰草撼撼響夜月其下有鳴蛩到曉啼不歇乃
知搖落時衆籟自感發安得苦吟人不能為一映

送棋僧惟照

學成九章開方訣誦得一行乘除詩自然天性曉絕藝
可敵國手應吾師牕前橫榻擁爐處門外大雪壓屋時
獨翻舊局辨錯著冷笑古人心許誰

送喻介夫

介夫陵陽竒男子節義素為人所談身長七尺氣萬丈
自謂流落誰能甘去將舊學中新格坐拾高第如手探
明年西歸有光耀且請為我來山南

飛泉山寺

東城兀高峰爽氣浮翠微霞光射巖壁中有寒泉飛上
方金僊家煌煌啓雙扉欄干出雲表目可了四圍我來
久不下幙影移斜暉風吹月中桂天香滿人衣遠渚鳧

雁落前嶺牛羊歸尚此戀幽勝不能手聊揮

山雨

山雨灑春城淅淅聲頗急牕下讀書人橫編揭陰濕高
鷲餓獨叫遠燕寒雙入南園有桃李盡抱羣梢泣

送牟太素山人

山人高迹若孤雲聊問太虛求所止昨因隨風起西北
翩然遠墮三隅裏攬之不住瞥爾去瞬息誰知幾千里
東遊必定遇鴻濛請問無為最深旨

送龐中秀才

曼倩學精知蜥蜴公明術妙識蜘蛛
臨卽復有龐成叔
萬事先將八卦圖

遣興效樂天

君莫學楊虞卿奉李宗閔宗閔權勢豈能久
君莫學劉栖楚附李逢吉逢吉祿位寧長守
雖然一時身暫好其奈千古名常醜
丈夫讀書要知道所信不篤被其誘
大張富貴作羅網愚者紛紛以身就
左纏右繞不可脫誅

竄還當逐其後君不見虞卿須遇李固言君不見栖楚
終遭韋處厚一朝推折靈氣盡龍如蛇今虎如狗勸君
聖賢術內好潛心勸君邪佞黨中休入手豈不知潞州
處士田佐時喚與美官嫌不受

遣興三首

惻惻抱伊鬱試此登嶠堯陰風吹繁雲黯黯蒙秦霄關
河渺無際節物何蕭蕭過雁安所之驚哀翻汶寥幽懷
漭如失隨此羣草凋嗟予生胡為迹玷明盛朝服職詎

云補赧然縱羣寮感此四序遷一昏復一朝寒霜入兩
鬢漸積不肯消良辰乖所遇慨嘆心魂飄賤稟迂且介
於時信無庸欲適闕所之此道當何從富貴諒非有僻
陋知可容豈不媿上恩耗此釜與鍾昨歸得此州滿眼
皆亂峯事物固瑣碎敢茲任頑慵報國祇自明惟神誘
其胸

其二

少小事編簡淵源極沿洄不自測其深津涯信悠哉既

長務修省日以德義培一簣敢中畫期之至崔嵬振纓
仕明廷鴛鷺忝遊陪蹇修無嗣者誰可吾與媒吐艷落
晚春萼然抱枯荻因人寔自恥寂寞余敢哀何當清冷
泉襟裾濯氛埃故山有松菊待賦歸去來

其三

連陰不肯解山霧嘗霏霏積潤日已滋厭浥沾人衣輾
轉厭早起隔牕問晴暉幸聞太陽出身體輕欲飛

中秋夜坐遣興

素紈不搖風滿襟露氣中夜寒相侵予懷浩然杳莫寄
伴月直到青天心

臨闌閣

絕壑迎朱檻高林拂畫楹卷簾千嶂遠入座一川平
蜺綵綠雲斷霞光射水明不須誇曠望為語謝宣城

野逕

山圃饒秋色林亭近晚晴禽蟲依月令藥草帶人名排
石鋪衣坐看雲緩帶行官閒惟此樂與世欲無營

寒蜩

山月滿地流金波寒蜩向秋鳴更多大都時節使如此
止爾不得將奈何

辛亥孟秋戊子有虹下天繞飛泉山入東谷飲
古井良久去作大雨吐之以詩

長虹落天帔萬丈截羣嶺蟠身下深谷頰首飲古井居
人莫之指況復敢引領幡然繞空去雲霧變俄頃乾坤
為之黑噴雨極暴猛崩流匯溝瀾巨漲沒四境民田一

漂蕩多稼不可省此物蓋蟲類聞亦具頭頸淫沴之所
生詩傳載為青朝西暮東出輒與日對影夫何此凶孽
得使乘時逞高風掃寥廓一帚昏穢淨煌煌太陽起隙
穴被光景羣陰逐海內此物應遠屏

寄何首烏九與友人

此草有竒效嘗聞於習之陵陽亦舊產其地尤所宜翠
蔓走崑壁芳叢蔚參差下有根如拳赤白相雄雌斲之
高秋後氣味乃不虧斷以苦竹刀蒸曝凡九為夾羅下

香屑石蜜相和治人白杵萬過盈盤走累累日進豈厭
屢初若無所滋漸久覺膚革鮮潤如凝脂既已鬚髮換
白者無一絲耳目固聰明步履欲走馳十年親友別忽
見皆生疑問胡得爾術容貌曾莫衰為之講靈苗不為
世俗知蓋以多見賤蓬藿同一窺君如聽子服此語不
敢欺勿信柳子厚但誇仙靈脾

霜栢亭試墨

山風吹早晴袂服覺微凜煙雲有佳尚竹石得幽稟閒

牕覆舊局晚閣試新品幾欲賦郊居竒詞未如沈

閱史感事

世間諸味已全疎惟愛練緗似蠹魚名霸者來為御史
姓關人去作尚書晉師嘿嘿曾何害楚客昂昂只自如
安得漢陰歸抱甕滿園青甲灌新蔬

富春山人為予道其所獲石於江中者狀甚恠
偉欲予作詩言若可得持歸刻其上當相與傳
無窮余夜坐平雲閣是時山月清凜啼蟲正苦

余因此景物索筆硯為山人賦之

竒礪嶺屹倚秋江俗眼過幾多所忽風霜鍛鍊愈堅重
怒浪噴激不可沒富春山人好尚古見此便以作吾物
鑄鏡牽挽置庭下犀角鯨牙蛟蜃骨精金凝滑露筋脊
老玉礪硯開竅窟狂螭奔拏勢天矯猛兕搏怒氣蓬勃
山人誇我謂如此欲我詩之慙拙訥何當走到山人家
撫月摩煙觀突兀

平雲閣偶作

陵陽郡事全稀少
嬾守長羸半日閒
晚後須來上高閣
就中無厭是雲山

聞陳山人定命丹成試以詩乞

水火相交養大還
已聞神汞滿爐乾
羸肪穀漆尋常得
敢服靈丹二萬丸

厭蟲

月出松塢明露下
蓮塘清今宵好風色
獨遠林下行百
蟲爾胡為嘖嘖
饒秋聲求靜不能得
我詩何由成

新晴山月

高松漏疎月落影如畫地徘徊愛其下及久不能寐怯
風池荷卷病雨山果墜誰伴予苦吟滿林啼絡緯

送堯夫二章

有志深沈定無心出處同廟堂應為國臺省復還公肖
似家聲重端方士論雄上如留左右風采壯朝中

其二

欲與民為利先求政所妨紛更初下議旁午遂交章不

爾毛安傳其如體自傷西南餘弊在歸為對明光

秋日田家

淘漉溝源築野塘滿坡煙草卧牛羊今年且喜輸官辦
豆莢繁多粟穗長

二色芙蓉

已下五首和
吳龍圖韻

蜀國芙蓉名二色重陽前後始盈枝畫調粉筆分粧處
繡引紅針間刺時落晚自憐窺露沼忍寒誰念倚霜籬
主人日有西園客得爾方於勸酒宜

洗竹和吳龍圖韻

斤斧從來到此稀為撩疎密遠藩籬已繁不用饒新笋
縱礙何妨惜舊枝風外清音聞曲閣月中寒影下方池
想公日在琅玕選正是棠陰訟少時

琅玕選在西園竹選名也

明堂肆赦不得預觀感而成詩

季秋陽館事嚴裡能饗洪惟上至仁游廟衣冠參帝座
侍祠簪佩儼星辰歡聲被寓和於律協氣流天藹若春
即見陪鑿千萬祀豈長如此在遐垠

經史閣

自持金節此爲州小善何嘗不見收更起麗譙連石室
盛藏縑帙擬蓬丘師延舊德皆高誼士集他邦盡久留
當念河南嚮儒意莫教弦誦少時休

有懷致政景仁侍郎

一生名藉占風流為識莊環可自由几杖未銷容早退
廟堂將近肯中休有人把酒思高節何處揮毫詠素秋
故國岷峩最佳絕幾時歸伴赤松游

吳公惠酒因謝

山城物色正嚴冬，梅放長梢露小紅。
破萼未深聊敵雪，收香不密任隨風。
儘教插滿金釵上，休管吹殘玉笛中。
須至開筵召佳客，為公連夜賞郢筒。

登陵陽雲山閣寄上吳尹

雲山高閣倚危墻，晚意無窮在渺茫。
極望不知雲幾許，滿空惟見雁交相。
與誰把酒邀明月，獨自吟詩到夕陽。
因念平臺有佳興，鄒生枚叟奉梁王。

和寄白聖均

年來雙鬢已絲絲
頭角低催羽翼垂
無命不窮常自笑
有謀皆拙敢求知
榮途謾說居三館
僻郡還甘守一麾
賴是山城好風物
不能逢子共吟詩

和提刑郎中閱兵之什

曉營金革列周遭
大纛長牙擁帳高
虎豹用韜傳妙畧
龍蛇供陣役羣豪
言初撫處如蕭續
恩盡均時若楚醪
敢謂施行剪諸盜
亡之纔比一牛毛

晚坐山亭口占

嶺上生來月似磨
崑前斷去雲如削
遙聞褐吏叩高林
應是雷公催采藥

送王晦叔

豈無舊德爲清望
亦有彊親在要流
班簿至今纔博士
郡書猶自許諸侯
貧甘遠宦冰盈腹
老憶高堂雪滿頭
不恃交期便求去
趁歸春圃奉蘭羞

重送

一生自守至如此惟道外皆非所親顧已通塞盡有命
是身可忍求因人

又六言

鷺尾歸舲正穩鴨頭春水方深不得同搖楚棹與君齊
到山陰

登山亭

登臨平楚外徙倚夕陽間歸鳥亂飛葉暮雲凝遠山行
知筋力倦愁欲鬢毛斑坐久成搔首疎慵好強顏

文領相仍意慮煩濁聊携野策獨訪山園因覩
霜栢亭殘梅憶公向時有詩酒之惠感物成詩
繕寫拜呈知府龍圖諫議吳公

昨日梅開飲公酒今朝梅謝念公詩眼前光景急如水
案上簿書婪若絲且試輟忙來此地可憐遺恨滿殘枝
西園想已成青實敢問調羹去幾時

依韻和張推官元夕

山郡上元榮樂事大開金地作遨場煙雲向曉誰教霽

燈燭乘春自有香
紫陌熒煌隨步遠
綵棚佳麗鬪眉長
遊人莫惜酬高直
買取銀蟾一寸光

小閣戲書

閒揭新刊集時裝
舊窰香還如到茂
灌無物在牀旁

伐枯株

層崖垂空石壁牢
上有大木百丈高
古荔全身裹鐵甲
頑薑滿腹鋪金毛
空根老蟒露擁腫
曲枿恠鴿爭呼噪
一朝壯士揮巨斧
無限隨死蓬與蒿

可笑口號 七章

可笑庭前小兒女栽盆貯水種浮萍不知何處聞人說
一夜一根生七莖

其二

可笑陵陽太守家閒無一事只栽花已開漸落并纔發
長作亭中五色霞

其三

可笑此公何太惑讀書寫字到三更也知學得終無用

自肯辛勤比後生

其四

可笑生平事迂闊向人不肯強云云到頭官職難遷轉
一似城南蕭次君

其五

可笑為官太微幸養愚藏拙在深山君看處置繁難者
日夜經營心不閒

其六

可笑兒孫亦滿眼朝朝庭下立參差謂言飽讀詩書去
憔悴如翁亦好爲

其七

可笑山州為刺史寂寥都不似川城若無書籍兼圖畫
便不教人白髮生

近日

近日簿書全簡少吏人惟趁兩衙休歸來便只尋冠屨
遠遍林亭山上頭

丹淵集卷十一

欽定四庫全書奮要卷一萬四千八百

集部

丹淵集卷十二

宋文同撰

詩五十首

送知府吳龍圖

國初已來治蜀者處置盡自乖崖公當時奏使便宜敕
不與天下州府同行之已及八十載姦宄消伏誰之功
因循至此漸抗敝有未曉者時相攻鞭管小罪亦檢察

不許略出常科中下民知之頗不懼州縣往往藏羣兇
側身斂足未動者實以累朝恩澤隆公之初來蜀人喜
慈愛舊熟民情通衆心懽然耻犯法掾藥浮薄歸醇醲
盡將約束付僚吏興起學校還文翁二年美化極沾洽
遠近循服如偃風上將歸公問誰代當使間作如笙鏞
遂求元老得青社其人廊廟之宗工往年鎮撫有異績
大旆再遣來於東公今與之合符去到必奉詔參夔龍
大資舊德固無慮剖判自出其心胸所憂厥後嗣之者

忠定良法還如空養頑活狡作淵藪不免剪殄煩興戎
同之憤薄久填臆言賤不得通九重願公上殿起居罷
第一用此聞宸聽

送通判喻郎中

前年為郡得陵時不謂其州陋如此蕭條官宇崑嶺上
零落民家坑谷裏西城初入已可厭竊謂豈堪余所止
幸逢之彥倅郡事日月漸深殊可喜予之所稟至迂謬
君亦恬然尤自委每來聚議一朝罷各去掩門歸隱几

雖然有時亦為會此事可知誰得已酒肴麈尾爨妓樂可
况復誦誦滿公使惟於試茶并看畫以此過從不知幾
幕中有客乃佳士愛遣高談聽竄竄如斯共處五百日
索寞情懷未嘗起君今官滿忽先去撩動予愁安可捥
英溪長亭一揮手自此吳蜀五千里謂言川江會北固
中亦有船多上水願君因出到金山遇此莫忘批紙尾

送通判喻郎中二首

晴霞照西城漠漠卷宿霧高空繚危磴此乃君去路吳

蜀向萬里上馬初一步莫言道途遠况已嗟久寓今茲
有行色便可到北固長亭聊把手幾日更逢遇不敢醉
君酒君意實急遽惟是送君心相隨亦東鶩

其二

羣居五百日日如初見一日忽遠別能不成愴戀人
生三萬日光景若激箭何苦於其間喜愠費顏面茲緣
勝心在胸內每交戰既欲多上人計校須自銜於事固
無補在已亦非便仕路繁此徒可謂丈夫賤愛君性渾

厚殊不與時變相共為此州敢說皆盡善何嘗分彼此
惟務乃職辨所以將二年無有長短辨為人倘如此所
至復何患官滿去還臺豈能忘眷眷陽關調雖苦且盡
西城宴問君到京國幾月方下汴予亦想是時移守至
梁甸佳音幸見及西南足郵傳

山城秋日野望感事書懷詩五章呈吳龍圖

原隰蕭條草木哀倚風渾類楚人悲便成孤憤終何事
且寄遙懷對此時千里暝陰雲杳靄一川寒影鴈參差

登臨自不宜羈旅更敢憑高賸作詩

其二

已是秋陰更夕曛亂山高下起寒雲危樓願見客何處
遠笛不知人厭聞身外流年波渺渺眼前生事葉紛紛
此愁萬斛誰量得直為重拈庾信文

其三

才力雖難敵楚騷賦詩常亦在秋多自然野思元無限
不爾閒愁可奈何要路故人皆廢忘偏州佳客少經過

明時且為貪榮祿豈學湘纍便九歌

其四

崑谷雨餘生晚煙高城危閣坐蕭然側身仕路本誰使
回首家山空自憐遠信斷來從過鴈苦吟多後敵鳴蟬
郡齋有客唯莊叟常與高譚內外篇

其五

早是蓬山預校讎起居常赴殿東頭鸛鸞擁陛聯簪笏
日月開天拜冕旒一出光陰銷遠郡兩形篇什詠清秋

有人更在楊莊上文似相如肯見休

東丘老人

東丘老人眉有毫皮肉光潤牙齒牢自云新年九十九
鬚髮白者無一毛問之吾術本無有噍津納息徒咄咄
莫將元氣佐喜怒自然所得春秋高吾嘗行之五十載
此事至易曾不勞飲之以酒謝使去手足輕利如猿獠
嘗聞唐人柳公度八十許歲精力豪其言與人亦如此
老人無乃斯人曹

送堅甫同年五首

堅甫神太清不謂久流落別來二十載論議轉深博其
中富所有種道以文獲鋪張講治亂破若勁弩殲衆人
謂青衫可笑俗眼薄蘭筋肋隱瘦骨垂耳受羈絡拳攣喙
拄地過者無伯樂去蜀持底歸雄藁滿壞橐朝辭玉壘
闕暮上石櫃閣知子者云誰獨我懷抱惡

其二

得數常竒懶下籌肯來荒徼治纍囚三年笑別浙江遠

萬里吟歸岷嶺秋
趙壹囊空王常骭
麟虞卿書就愈窮愁
跣香回臭都休問
未有林泉且宦遊

其三

春深行劍棧
羨子此時歸
照日江浮馬
迎風花聚衣
下程家累省
對景俗題稀
若遇西來客
書言不可違

其四

春風吹雪滿西窓
此夜無人對酒缸
若到杭州見蘇子
為言常夢過松江

其五

華亭有珍禽毛豐而骨細他日上隋渠為我致清唳

送李道士歸

先生狀貌古瘦健若老鶴秋風唳清霄寒響滿寥廓一
腹冰雪詞勿為俗人作便可住鵝池乾死守宮壑

師厚還朝

聞公之名三十年常恨與公不相值豈期今乃出門下
每一見公心自醉詞章豪蕩已難敵辨論注射尤可畏

諮詢故事要蔣又講正大體須賈誼荆山拾玉抵乾鵠
虞坂裝鹽壓良驥用人最忌非所宜願莫使公嗟俗吏

牽牛織女

桂陽有仙人姓名武丁胡為墮人世
人惟識其形一日語其弟吾將返青
冥乃曰此七夕上天呼羣靈織女
欲渡河暫詣牽牛星諸仙盡還宮
天路羅雲駟吾亦向祈召當往不
得停弟問何時還答云三千齡明日
失丁在恍惚迷所經後世凡此節
兒女喧家庭縱橫具鍼縷

花果排甘馨貪巧但云得欲寐曾莫寧俗尚每怪妄吾
言誰見聽

金鳳花

花有金鳳為小叢秋色已深方盛發英英秀質實具體
文采爛然無少缺纖空翩翩翠影動紅白紛亂如點纈
誰云脆弱易飄墮自卯至翼亦數月美人形相欲摹畫
巧不得施暫自拙鋪茸剪綵轉難似只把長條恣穿結
眼前草木盡零落憐爾開於此時節常闕
如小兒花

性命所繫不忍折君不見昨夜雨今朝風一隊驚飛返
丹穴

亭前高栢

石田磽磽地力燥誰種雙栢已高大長材夭矯堪巨棟
老頂縈紆若層蓋雪下孔翠寒不起風中笙篁清可愛
菟絲幸好求女蘿莫倚纖柔欲無賴

凌霄附栢

古栢蒼蒼高入雲凌霄萬朶擁其身有如巨君染須髮

新娶杜陵佳麗人

謝黃森惠詩并草書 黃蘭溪

南鄰黃夫子生平氣凜然吟詩舊有癖寫字近方顛可
惜空山老須為後世傳蘭溪修禊否願續永和年

東齋悶書

讀書已無效何用轉勞苦閒齋幸無事日共古人語古
人議論好善惡皆有補舍此欲奚為惟應睡滿午

寒食感事呈同官

三月八日值寒食陰霾蔽空不肯收北園花木殊未動
到處哭雨惟鳴鳩吾曹可憐愛薄宦甘此寂寞來山州
酒肴有無更莫問逢遇相與清談休

惜杏

北園山杏皆高株新枝放花如點酥早來其間有啼鳥
兒女盡識名提壺急教取酒對之飲滿頭亂插紅糝糊
可憐後日再來此定見隨風如錦鋪

讀蔣都官畫像記

蔣為永康軍判官
甲午之亂死於賊

聞昔妖氛滿巴蜀所臨州縣偃如風其城陷者盡從賊
以義死之惟有公節與岷山高莫敵名隨阜水注無窮
蘭臺秉筆今誰氏舍此何由壯史功

題黎公照序訓堂

常愛三峨臨古郡君之別業在其城近營大第當高處
更起新堂立美名滿外江山皆秀絕入中文史自縱橫
如何置得烏尤住相與談經過此生

朝陽亭

峩峩乎守居已與前峰對朝陽乃危榭更在守居外煙
雲一川滿林麓三山會近檻有胡牀無忘傲公退

觀風閣

危閣覆高林晚步聊徙倚東南兩峯斷空濶見萬里茫
茫落霞外冉冉孤煙裏忽暗識歸雲乍明知積水風從
半天下月向平地起夜久殊未還峩冠露盈几

山池

偏側蒼苔地佻邪白石池數枝紅菡萏幾尺碧連漪魚

鬪爭香餌兒童簇釣絲
愛來芳蔭下每日日西時

憶西湖舊游

西湖晴碧晚溶溶
與客常來坐好風
記得有人歌小玉
月明猶在畫船中

再送師厚

久使西南此召還
鹿頭東去漸雲山
莫嫌策馬經燒棧
正好題詩到散關
財利文書猶絡繹
邊防田地已朱殷
竒謀不吐將何用
况是歸臨咫尺顏

平雲閣觀雨

黑雲滌天雷破地風卷雷射雨傾瀉噴崖倒壑恣頽蕩
咫尺不可辨牛馬雞豚已見逐高浪禾稻應須沒平野
莫言魚鼈走堂厨且看泥沙漫屋瓦

不雨

陵陽官居遇久旱發喘渾如起新病已驚赤日晨可畏
更恨炎風午尤盛徒嗟禾黍盡焦落無奈蠅蚋轉豪橫
安得神龍駕九霄大霖滿傾如倒井

久雨

寒鳩劬屋上鳴欲使此雨何時晴
山中有客抱幽鬱
日日起望東方明今朝晚霞發光焰喜極再拜當西楹
須臾雲陰又蒙沒遣我涕淚流沾纓

山園

久雨無所適新晴步山園
西風滿高林敗葉驚已翻
時節急如此世事安可論
夜歸燈下吟寒蟲伴幽喧

石泉

巖巖聳石壁，拆穴中流泉。斷崖散激激，曲竇藏涓涓。蓄
潤活古蘚，烝虛發晴煙。時懷一勺惠，使我心冷然。

史少訥見許江豚，未得以詩戲之。

霜重水落岸，有冰江豚乘寒弄。晴日搖波拍浪乍，羣起
尾厚喙長鬚鬣赤。漁人清曉橫巨舟，一舉大網凡數頭。
想君盤筯已厭足，何不略遣來陵州。

北園梨花

寒食北園春已深，梨花滿枝雪圍遍。清香毋向風外得，

秀艷應難月中見苦嫌桃李共妖冶多謝松篁相葱蒨
黃鸝紫燕莫過從時有一聲拖白練

華山二首

崑頭漠漠衛卿雲谷口紛紛張楷霧安得鉤梯上石龜
欲看明星洗頭處

其二

石蓮峩峩橫紫霄中瀉萬丈銀河水安得大箭長八尺
欲與天神博於此

黃崖洞

黃崖大洞埋古雲入去所履平如席其中玉髓盡可食
只恐歸來變為石

師魯推官惠甘蔗戲謝

滿節甘滋滲齒寒醍醐誰與釀琅玕不知佳景何時入
試似前人取倒飡

寄呈溫江安寺丞

高崖古驛荒涼甚過客何嘗住久之獨有門邊君寫處

每來無不讀多時

嘲任昉

幸自文章亦可憐
不消一事已為賢
何如却逐蟲兒去
忍耻更來王亮前

素術

四代司空倚世勞
可嗟不肖事女豪
妄云名字與讖合
直欲起應當塗高

偶成

僻陋為州耻不才偃然空見兩星回祇應歸舉謠言日
三府諸君口盡枚

即事

公禮欲下格具觀人所存須知范孟博豈肯伏陳蕃

薄命女

天天東鄰姝艷色如春柔去嫁不得偶羅衣空自羞輕
埃掩菱花不分鉛華休回首視庸奴寂寞還卷收

子平寄惠希夷陳先生服唐福山藥方因戲作

雜言謝之

蜀江之東山色盡如赭有道人云此是丹砂伏其下煙
雲光潤若洗濯澗谷玲瓏如刻畫我聞神仙草藥不在
凡土生是中當有靈苗異卉之根莖果然人言所出山
芋為第一西南諸郡有者皆虛名就中唐福衆稱賞
肥實甘香天所養有時嵩頭倒垂三尺壯士臂忽然
洞口直舉一合仙人掌土人入冬農事閒千篝萬鍤來
此山可憐所鬻不甚貴著價即售曾不慳往年子瞻

為余說言君所部之內此物尤竒絕後復寄書勸我當
餌之滿紙親題華嶽先生訣予因購之不惜錢依方服
餌將二年其功神聖久乃覺牙牢體溢支節堅自問丹
霄幾時上早生兩翅教高颺塵世如絮不可居待看鴻
濛對雲將

丹淵集卷十二

謹案卷九第一頁後八行苦將韁鎖強維繫刊本
繫訛擊今改

第七頁前三行欄楹曉落天倉月刊本倉訛蒼今
改

卷十第五頁後一行每至瑤魄流光下刊本魄訛
魄今改

卷十一第五頁前四行蜺彩緣雲斷刊本蜺訛蜺
今改

第六頁後五行蓬蓿同一窺刊本窺訛虧韻複前
今改

第九頁後一行洗竹和吳龍圖韻刊本洗竹下脫
和吳龍圖韻五字據宋詩選增

卷十二第二頁前五頁不謂其州陋如此刊本謂
訛請今改

第八頁後三行南鄴黃夫子刊本鄴訛斲今據蜀
地志改

第十二頁前八行清香每句風外得刊本清香訛
青春據宋詩鈔改



總校官庶吉士臣侍朝

校對官編修臣閔惇大

謄錄監生臣沈啓晉

謄錄監生臣任益春

欽定四庫全書薈要

集部

丹淵集卷十六

三五



詳校官助教臣常循

欽定四庫全書薈要卷一萬四千八百一

集部

丹淵集卷十三

宋 文同 撰

詩四十四首

李太尉固

昏霧翳紫極橫霓勢光大妖威集凶冀忍穢實中賴女
銜日增剡誰汝觸取害驕根愈自固所植利孱昧容容
彼羣輔竄伏皆鼠輩側視况未敢肯復形歎慨太尉漢



中士氣引八極外岌然處大麓天下聳風采自開煮餅
禍賊意已莫快移書瀝憤膽語激益睚眦罹冤卒用此
數與六九會基茲被沈酷燮免乃天貸高忠揭萬古宇
宙莫能載垂晶耀簡策糞土視廣戒歸來葬壘燒祠冢
茲儼在宏坦敞深豁巨木森掩暖神靈皎如日過者知
再拜同愚忝郡寄公里曰境內心期款舉像所顧官有
礙精束託明酌舉手向東酌

趙壹

壹也本西縣狀貞徒磊砢其才固難得行有所不可世人詎能掩而爾輒自我既愆焉得剛所守實未果抵罪當至死其中遂水火一為人所活上賦何瑣瑣為文好譏罵惡吻事掀簸逢陟與規輩次第滋爾禍無成困鄉里倔僵老愈叵何煩遣相視器識自么麼余因守漢中作詩揭墓左勸君莫學子壹學子壹終坎軻

張騫冢祠

中梁山麓漢水濱路側有墓高嶙峋叢祠蒼蔚蔚蔽野霧

榜曰博望侯之神當年寶幣走絕域此日鷄豚邀小民
君不見武帝甘心事遠略靡壞財力由斯人

駱谷

高峯偃塞雲崔嵬鬼窟層崖巨壑長峽開龍蛇縱橫虎豹亂
古棧朽裂埋深苔行人側足恐懼過飛鳥斂翅哀鳴回
君不見德宗注意用姦慝大駕從此蒼黃來

慈濟院雙楠

雙楠高聳綠氤氳密葉長柯蔭四鄰佛現寶幢經幾劫

天開雲帳待何人護持必有諸賢聖觸犯寧無惡鬼神
付囑寺僧常灑掃莫令向下有纖塵

觀音院怪松

怪松屢見無如此每度來觀說向僧若遇風雷宜守護
恐生頭角便飛騰秋聲遶殿隨齋磬夜影侵廊對佛燈
韋偃畢宏今不在欲求人畫有誰能

江原張景通善頌堂

庭前雲蓋碧嶸岵品堂上先生雪滿髯說藥客來聊下榻

謁齋僧去便垂簾種時法好花難謝買處錢多石易添

子舍光榮身壯健只將香火事華嚴

雲蓋堂
下石名

夏夕

池館蕭然夜欲分滿林蟲鳥寂無聞風吹松子下如雨
月照荷花繁若雲泉作小灘聲浙瀝筍成新竹氣氤氳
清陰正覆吟詩石更引高梧拂練裙

寄宇文公南

自文州曲
水今棄官

彭澤長謠便歸去君辭曲水亦其徒一官何藉五斗米

二子况皆千里駒，懶對俗人常答頰。
厭聞時事但盧胡，從來綿竹多賢者。
唯是揚雄識壯夫。

北禪龍井

城北神龍去幾年，近日人言歸舊址。
澄潭沈沈不可近，百步之外毛骨起。
今年興元輒愆雨，衆懇問龍求滴水。
香煙纔上雲滿空，一夜滂沱遍千里。

送潘司理秘校二首

已自多時賦式微，五峰佳景夢長飛。
四年遠地為官去

萬里高堂喜客歸，下馬便呈新授敕。
開樽爭認舊縫衣，鄉人覓次來相賀。
尊菜鱸魚正軟肥。

又五言

曲棧繞斜谷，鉤欄天際分。
吟鞭搖嶺月，倦枕拂溪雲。
好景不關俗，新詩皆屬君。
西南有歸客，一一幸相聞。

收復河湟故地

啞兒峽西山已塵，馱金輦帛無斷羣。
河湟故疆盡收復，解辮厥角歸如雲。
堂中玉帶賜丞相，隴外金節酬將軍。

唐兵萬里若日月請作古今人未聞

自斜谷第一堰沂舟上觀石門兩岸奇峰最為
佳絕

北風吹雲落寒水逆波刺船行五里層巒夾空抱叢石
萬劍側脊翠烟起草木枝葉自殊別禽蟲羽毛亦奇詭
安得雞冠數稜田便可誅茅此居止

宿斗山奉真宮

山形如斗勢坡陀魁枕杓攜萬尺高近世無人知火棗

當年有客得蟠桃靈蟾尚隱凝瓊髓神鶴常歸墮玉毛
一夜杉松響天籟滿空疑是奏雲璈

晴望漢川

城頭看雨霽天地若新浴晚容變雲霞秋意著草木四
時易遷改萬事苦迫促舊山何日歸三徑有松菊

清景堂

公外捐塵慮間中見物情蕉花紅炬密竹節粉環輕燕
泊簾鉤語蜂尋筆架鳴靜能知此趣吃吃笑勞生

梁山大雪

嚴風吹屋鳴向曉
尤凜冽應從北山上一夜吹猛雪幽
人不能飲身體冷如鐵
空向龍具中苦吟聲不絕

寄夏文州左藏侑二首

翩翩貴公子佳譽本能文
大第辭京輦高旌擁塞雲
勸農唐刺史養士漢將軍
莫刻和戎誓朝廷立功勲

其二

寄語文川守謀邊想甚勞
封疆通鳥鼠種落雜猿甲

馬廉頗少詩書，却穀高堂須辦。乃事不用耻弓刀。

狗溪迎湫祈雨輒應

夏雨渴久矣，秋苗憂槁然。至誠通祝版，靈貺逐香煙。桐
被應無訟，困倉定有年。曹公三大堰，一夜滿民田。

晚興

衆吏晚已散，西園常訪尋。覆棋苔閣靜，行藥草橋深。
草色晴承屐，松陰密灑襟。山蛇欲重賦，倚竹聽清音。

嘉川道中寄周正孺

草木春深後山川雨過時清佳常滿目哀倦敢忘詩好
尚舊若此飄零今比誰爭如畫堂上日日聽新詞

還李中舍杞奉使集

奉使道中詩百首古人遺落盡冥搜自憐吳蜀佳山水
一夜燈前得遍遊

雪後寄景孺提刑

時按洋川

雲陰低重雪花繁夾道歡謠引使軒何處郵亭鍊佳句
綵毫揮罷索清罇

寄永興吳龍圖給事二首

高春鈴下索焚香鏤管紋
戩戩綵章應在後園涼榭裡
玄霜仙帽紫霓裳

其二

見山樓迥倚晴虛
看展終南百幅圖
聞說二林尤勝絕

想公高興在香爐

公有別業
在爐山

其三

土風豪盛古長安
誰謂元侯卧治難
使客不來公事

少一林蘄草石林寒

不飲自嘲

能詩何水曹眼不識孟鑑而我豈解吟亦得不飲名持
此以立世可笑實浪生

寄紀禪師

自笑塵中游宦客長輸林下坐禪僧水田百畝一區宅
歸老城南何日能

中梁山寺四首

臺殿掩暖山焦堯雲霞鮮明天次寒側身下望厭塵世
安得羽翼凌九霄

其二

煙巒彩翠霜林紅層樓複閣雲霧中襟懷太爽睡不得
一夜滿山鈴鐸風

其三

群峯南北爭嵯峨如瀉大壑翻衆波愛之欲把入圖畫
世無好手將奈何

其四

上方梯磴繞崑頭誰就孤高更起樓直望漢江三百里
一條如線下洋州

仙人二首

身著青羅緋衣裙口誦白羽黑翮文半空欲下復不下
回首翩然歸五雲

又

頭梳三角髻餘髮散垂腰時伴秦樓女月明吹紫簫

山堂前庭有奇石數種其狀皆與物形相類在
此久矣自余始名而詩之

鸚鵡石

靜立身微聳鷲窺首略回何人將至此應自隴山來

柘枝石

紫鮮裝花帽紅藤纏臂幃被誰留田斷拍長舞不教休

狻猊石

巨尾蟠深草豐毛覆古瓦
彫欄臨綺席長欲上香臺

崑崙石

雨漬身如漆苔侵面若藍問時都不語應是憶扶南

羅刹石

洗濯形容露剗挑口眼通試教常點檢每夜定飛空

珊瑚石

海底初生處扶疎苦未全幾時隨鐵網流落漢江邊

病眼

病眼每至午其視何眈眈安得張中書就欲求古方

吾友務深有歎琴之什運使子駿答之佳章務
深亦使余繼作

白水滿方湖山中好秋色逋翁促瑤軫來坐湖水側臨
風起高調此興浩無極波靜戢游鱗雲空矯飛翼蕭條
變林野萬籟一以息且莫緩商絃令人涕橫臆

丹淵集卷十三

欽定四庫全書薈要卷一萬四千八百二

集部

丹淵集卷十四

宋 文同 撰

詩四十九首

子駿運使八詠堂

八首

寶峯亭

嘉陵抱江回平行出橫澗中間築雄壘獨據兩川會行
臺敞嚴府磊砢北城外潭潭走群楹直上巒嶺背危牆

繚空濶飛閣入茫昧上有寶峰亭仰見白雲內山峒堯占
孤絕下與萬山對層欄動寥廓曲檻枕闌闌主人從籃
舉晚興在公退心掩萬象遠目引八極大鈎簾拂坐榻
隱几緩衣帶詩書挾關鍵筆研產珠貝是時衆吏去不
敢呈計會雖然彼郡邑原本窮利害自取金穀饒無煩
米鹽碎此地寄清襟歲書從屢最

桐軒

晴影滿空壁晨曦上清軒庭下雙高桐枝葉蔚以繁種

者意自遠豈並羣木論謂可絙朱絲中有雅韻存成之
在誰手但為培霜根須知治世音盡付於此孫

栢軒

沈沈敞幽軒聳聳列寒栢清音納牕戶爽氣逼几席主
人重端勁坐若對佳客時復下撫摩破蘚交履跡此意
乃如是來者當愛惜大厦須良材相期早千尺

竹軒

此景絕可愛叢筠挺修竿侵簾復映幌翠影何檀欒霜

威忌晚秀雨氣矜晴寒每向極靜時幽禽發清彈自無

車馬塵飛來泊琅玕宜遣老鈴下日日申平安

李衛公
言北地

童子寺有好竹其綱維

令人每日報竹平安

巽堂

華堂聳巖臺地勢側隨水高臨巽宮上其取名以是我
我寶峰頂日影正辰已繚棧入雲林詰屈如篆字輕霏
互虧蔽亂樾紛間廁賓來獲清歡吏散生野思靜見
萬物本一一齊於此體道以行權端居得深旨

山齋

職事凡少休餘復不經眼幽齋設橫榻盡日對層巘遙
懷寄浩蕩靜想縈巖嶮松雨潤書廡竹風吹酒盞紫名
付傲兀勝事入清簡雖有舊林泉何須嗟去晚

閑燕亭

靜宇占幽深是中何所有軒牕極清潔硯席羅左右公
餘每休此俗客曾不受六尺局脚床解帶就橫肘掃除
閒景物健筆當大帚敢問公許年得詩凡幾首

會景亭

誰茲敞高亭磴道繞千蹋江山接平遠百里俱會合人
間最佳景牕戶供遠納煙雲互蔽虧蟲鳥相應答吟牋
摘竒勝畫筆寫紛雜安得日從公短屐手自蠟

呈李堅甫中舍杞

往年曾憶過長安短紙書名請門下君時延我坐終日
灑掃東軒留看畫橫圖巨軸不知數但見匣中時一把
甲猶未竟乙復作門類著番開滿架使人歎羨不能已

只恨有門歸隔夜歸來兀坐想精絕念此崇觀若為謝
就中寒林兩大幅此物世間誰敢價倏然一別十五載
常向人前盛誇詫因君奉使臨敝邑見先問此餘不暇
君能為我再講說座上不容人俗話如君所蓄更誰有
有亦未能無笑罵况君累世盡清職摹本敢來前弄詐
君今還省正擢用異日須求作鄰舍我巾曳屨日相謁
更欲重煩開幾帊待尋前輩用心處款曲應須頻假借
每厨閱訖當便還不敢奉欺言羽化

采芡

通判盧微之搗種
種之次年大盛

芡盤團團開碧輪城東壕中如疊鱗漢南父老舊不識
日日岸上多少人駢頭鬢鬆露秋熟綠刺紅鍼割寒玉
提籠當筵破紫苞老蚌一開珠一掬吹臺北下凝祥池
圃田東邊僕射陂如今兩處盡堙沒異日此地名應馳
物貴新成味尤美可惜飄零還入水料得明年轉更多
一匣清波流珠子

峯鐵峽

東風吹空力何短三月隴山全未煖
文法姦酋引騎兵飛隨銀鷁弓刀滿
霜矛雪甲寒如水候卒何由知首尾
君不見峰鐵峽頭雲色死一過蕭然五十里

周思道如詔亭

繁上先生教子時義方題榜貼亭楣
當年此地開師席今日其言入制詞
鄉里共傳為盛事鬼神相助使前知
後人若續成都記第一詳書不可遺

陵井喻氏歲寒山居

巖平處士居山日手種青松一萬根歲月漸深枝盡偃
雪霜雖厚葉仍繁本營勝槩逃軒冕更結清風遺子孫
寄語後人須愛護莫教空有令名存

提刑司勳示及暝禽圖作詩詠之

朱華盛發穿疎竹寒柝齊枯徧野磯大雪蔽天方亂下
衆禽爭地各相依非公好事誰能得此畫如今自己稀
試待晴明挂軒壁定開羣眼一時飛

北齋雨後

小庭幽圃絕清佳，愛此常教放吏衙。
雨後禽來占竹，秋深蝶下尋花。
喚人掃壁開吳畫，留客臨軒試越茶。
野興漸多公事少，宛如當日在山家。

北城樓上

滿目望不極，城樓當最高。
地形連楚閩，山勢入秦豪。
平外斜通路，深中遠認褒。
圖經何壯觀，故事有蕭曹。

晴登北城

積雨已逾月，久妨於此行。
雲山勞夢想，風日幸晴明。
常

愛往來處盡皆苔蘚生一壕新草木強半不知名

寒食書事感懷

寥寥官舍靜於僧雖有園亭亦倦登
桃花杏花陰流似水
圖書滋味冷如冰
坐觀榮戟慙無狀
歸掃松楸恨未能
得報君恩便休去
虞卿前日本擔簦

送李堅甫中舍奉使還闕

自洮西
又入蜀

曾歌出塞愁又遣使西州去
國星辰動還家歲月流
褒斜新路晚鄠杜故園秋
歸對延和殿從容問講求

漢中城樓二首

解帶緩幽憂登城復上樓
斷煙橫沔水孤雉入洋州
浩蕩成遙望淒涼起暮愁
山中自有桂何事此淹留

其二

蘚徑踏層斑高林古木間
鴈隨平楚遠雲共太虛閒
晚靄昏斜谷晴陽露斗山
將身就清曠名路爾何顏

凝雲榭晚興

晚策倚危榭羣峰天際橫
雲陰下斜谷雨勢落褒城
遠

渡孤煙起前村夕照明遙懷寄新月又見一稜生

山堂偶書

幾日無公事山堂興頗清和詩防積壓丸藥趁晴明
石新稜出澆蔬晚甲生此皆忙外得低首笑塵纓

清閣

治庭區紜紛齋閣簡應接身閒喜枕簟慮靜厭圖牒
孤芳媚深叢幽哢出密葉物理茲領會真境知可躡

靜庵

問此初誰築經營差法爾能依深還巨木就蔭覆高藤坐
與境同寂來無人可憎一床黃卧具茂灌本如僧

忘憂堂

磴道循城近垣牆占地幽軒窓誰指畫硯席我優游不
許簿書到恐為圖史羞此心元自適何處欲忘憂

夏日官舍

省事公多暇虛心景更長捨書無可樂就枕不能忘短
葛沾肌薄寒泉沃肺涼何當逢靖節相與話羲皇

寄成都趙資政

纔承寵詔聯公鼎便謁除書別帝閭萬口一詞歌盛德
四年三度福遐藩已為魁壘無雙士更入摩訶不二門
應笑臨邛病消渴最先參見在江原

晴步西園

急雨正新霽林端明晚霞松亭臨曠絕竹逕入欹斜花
落留深草泉生上淺沙稚圭貧亦樂一部奏池蛙

金影軒

開軒俯清溪正在脩篁內霜筠抱水節爽氣常四會主人厭俗客日與此君對月上寒影來滿襟搖瑣碎

忽憶故園修竹因作此詩

故園脩竹遶東溪占水侵沙一萬枝我走宦途休未得此君應是怪歸遲

寄景孺提刑時按武興

夾欄虛棧武興西使騎翩翩晚夕馳想過飛仙須下馬此中佳景入吟詩

子駿遊沙溪洞

聞有沙溪洞公將柅使輪還如探禹穴應見避秦人石
繖形容古琳房氣象春若逢丹輦客問取虎文中

送郭榮叔秀才應武舉

愛君才辯吐如傾圓直橫斜善講兵休弄向時閒筆硯
破蠻征虜是功名

乞畫鴈寄涇州母使君

寒影亂翻秦嶺月晚行高處隴山雲回中有客能傳鴈

異日從公乞一羣

興元府園亭雜詠

甚美堂

潭潭棟宇盛
窅窅軒牕闢
高深與地稱
可大張宴席
府事如少休
茲馬會佳客

武陵軒

水從前嵒來
轉入後溪去
中間載酒下
各到客前住
醉後皆恍然
再來無覓處

綠景亭

竹間有幽亭所宜惟暑飲層陰隔炎日四坐障綠錦過
午不可留單絺覺微凜

激湍亭

高輪轉深淵下瀉石蟾口臨之設軒檻清絕更無有愛
此山中來應須坐良久

凝雲榭

朝雲南山吐暮雲北山翕來往高榭中留者頗堆積坐

客如久之去須襟袖濕

照筠壇

積土削為壇險然在深竹中惟一詩石獨坐擁寒玉勿
謂人少知此境不容俗

桂石堂

嘗聞陽朔山萬尺從地起孤峯立庭下此石無乃似愛
爾常獨來一日須三四

四照亭

巒嶺附梁山汀洲隨漢水秋容上屏障左右二百里此
景誰能論殘霞獨憑几

垂蘿逕

長蘿託高株晻曖蔽煙霧垂蔓已百尺更引欲何處願
少放餘條恐傷君所附

盤雲塢

幾曲上層城盤盤次文石愛之有佳趣不倦紆晚策禽
蟲應見疑日遇此狂客

北軒

天上之貴神所居皆在北有軒正相望慢恐取陰劾余嘗過則趨不敢茲少息

棊軒

北城云最高上復有喬木垂蘿密如帳中乃營小屋時引方外人百憂銷一局

山堂

何以山名堂層石作崖巘余本品穴士每往不欲返公

吏呈俗書還來愧冠冕

靜庵

知動以為幻既知即非靜名庵以靜者無乃自起爭為
語庵中人勿以靜為病

丹淵集卷十四

欽定四庫全書薈要卷一萬四千八百三

集部

丹淵集卷十五

宋 文同 撰

詩六十三首

將赴洋州書東谷舊隱

晚客無一來獨步入東谷園林已成就此景頗不俗
落巖畔松脩脩澗邊竹爽氣逼襟袖清如新出浴寒泉
激亂石石砢砢漱瓊玉荒溪漬餘潤滿地苔蘚綠珍禽靜

相倚毛羽華且縟高下相和鳴不去若馴伏幽花雜紅
紫點滴亂盈目坐久微風來時聞散餘馥往年讀書處
宛爾舊茅屋雖然小破壞脩整可數木開門拂軒牕無
限起蝙蝠縱橫列蟲網不免自掃撲壁間細書字多是
親寫錄當時苦謀身如此用意毒于今三十年才抵羊
髀熟一從入仕路行步每踏蹶所畏惟簡書其甘者藜
菽中間何大幸致身在天祿無狀陪俊游俛首常自惡
連章乞外補得郡悉鄉曲雖名二千石敢自辭碌碌朝

廷設新法布作天下福或慮多垢玩訓戒稍嚴肅刺史
當是時能不為驅督行之以中道勉副議者欲刻薄素
所憎忍復用刑獄進身豈不願實懼有陰戮昨從漢中
歸於此度炎燠親朋日相會分義愈敦篤便欲從之遊
投簪解朝服退自數年計伏臘殊未足還當武康去就
養若雞鶩貧雖士之常於我何迫感單瓢若自具尚可
繼前躅奈何食口衆不比回也獨東方千餘騎導從催
我速行復登長途貌展心甚縮淵明豈俗士幸此有松

菊

崔覲詩 大中時人

崔覲者高士梁州城固人讀書不求官但與耕稼親夫
婦既已老左右無子孫一日召奴婢盡以田宅均俾之
各為業不用來相聞遂去隱南山雜跡麋鹿羣約曰或
過汝所給為我陳有時携其妻來至諸人門乃與具酒
食嘯詠相歡欣山南鄭餘慶辟之為參軍見趣使就職
漫不知吏文已復許謝事但謂長者云補闕王直方本

覲之比鄰文宗時上書召見蒙咨詢薦覲有高行用可
追至淳詔授起居郎褒斜走蒲輪辭疾不肯至高風際
秋旻我昨過其縣徘徊想芳塵訪問諸故老寂無祠與
墳斯人久不競薄夫何由敦此縣漢唐時諸公揚清芬
刻詩子堅廟來者期不泯

寄題閬州開元寺澤師竹軒

澤師種竹三十年竹成滿院生綠煙蒼龍子孫太繁盛
分領眷屬來渭川藏風蓄雨蔭殿壁不敢輒近寒森

然香飛常入佛座上葉落不到經牕前芟除掃掠淨如
洗欄外不許行狂鞭澤師瘦健如老鶴壞衲幾尺披左
肩手持數珠讀梵夾狀貌兀若塙與鑄朝旋暮繞在其
下不肯出院求齋錢古人亦有愛竹者豈得似師心意專

我亦平生苦如此兼解略把筆墨傳逢師正謂同所好
但恨尚有區中緣何時相對月明下坐徹清影談幽禪
寄題密州蘇學士快哉亭太史云此城之西北

送客處也

出城送客客未來主人到此先徘徊地臨灘水極清曠
每為送客雙眼開客來既坐歌管作紅袖勸酒無停盃
主人自醒客已醉門外落日驪駒催揖客上馬退岸幘
未忍便擁千騎回滿襟高興屬軒檻野濶風長真快哉

獨游

孤亭入陰森竹逕背松塢高林動清吹猶滴前夕雨解
衣此危坐左右一不許性本不奈雜况復茲寡侶孤懷
託寥曠世慮絕參伍幽花為誰笑獨鳥只自語身閒得

天全一息了萬古忽往而忽來其誰知踽踽

夏日湖亭試筆

亭臺清涼水竹淨愛此來避蚊與蠅蓮花窺人類楚女
野鳥彈舌如胡僧旋來開卷坐松蔭却把釣竿沿石稜
二年何幸爾足樂慙報上恩無所能

楊山人草堂

九隴山人文父後心閒身健兩誰如玉函經外傳竒訣
畫戟門前創隱居入鼎靈丹黃似橘隔牆凡境臭如帑

何時再到高栴下倚徧清陰聽道書

詠鳧

雙雙紋羽弄清漪全得天真似爾稀萬頃滄波供口腹
一梁寒日曬毛衣雨歸別島嘔啜語風度前灘翕呷飛
好向中流最深處等閒休要上漁磯

弄珠亭春望

岸柳舞毵毵春醲物象酣煙雲分極浦舟楫聚回潭上
水魚千萬眠沙鴈兩三遙懷無可奈長是寄城南

新晴望北山

西風吹北山晚日曬新雨
嵐光發巖岫草木紛可數
翠壁倚萬丈白雲橫一縷
待訪滄霞人斯游欲誰與

城南江館

漢江之北涯軒宇頗高爽
西南正空闊時此託遐想
誰家有竹石更可悅新賞
待學素愍孫乘興欲直往

屬疾梧軒

高梧覆新葉滿院發華滋
白日一何永清陰閒自移
暖

蟲垂到地晴鳥語多時病肘倚枯几泊然忘所思

北園避熱

繚繞渡回塘紆餘轉短牆引筇聊散誕入竹得清涼正
午禽蟲靜初晴果木香移床就高處更欲解衣裳

施公潭

盤巖復轉溪磴道入雲微斷巘雙屏立垂泉一劍飛浮
空交彩翠濺遠亂珠璣啼穴饑鼯出翹灘宿鷺歸寒光
清徹骨晚氣潤沾衣東谷牛羊下搖鞭去夕暉

罷郡

自問爾何事端然信方策本是鉏犁人強為簪組客何
嘗補萬分徒自勞七尺還如裴昭明罷郡歸無宅

送文鑄師游襄陽鹿門

師今鹿門去正此冒炎曦野店乞晨饌亂山吟古詩問
程行幾日覽景立多時我有懷賢意憑看墮淚碑

夏日南園

陰陰喬木下翠影若雲浮滿地紫桑椹數枝黃栗留迎

風湖上去避日竹間遊定作今宵雨繞牆啼曉鳩

北樓晚晴望秦嶺

秦嶺巉巉列萬峰晚嵐渾欲滴晴空如何學得崔重易
吟嘯終南明月中

柳枝

牆宇周回院落深日光風色淨陰陰柔條一似孫荆玉
帖地反霄銜寶簪

送王存之

野水冰生薄似綿
短亭梅發大於錢
想君歸到江陽日
欲話今時已去年

放言

稗海之外既爾知
自問何苦安喧卑
胡不往見蒙穀士
看卷龜殼食蛤蜊

寄褒城宰

艷艷清波瀉石門
茂林高嶽夾煙昏
何當畫舫載明月
共醉江心白玉盆

贈竹簣簞谷

我昔初來見爾時
禿稍孿葉病離襪
遮根護筍今成立
好在清風十萬枝

竹答

我實仙陂百世孫
二年生長感君恩
近聞官滿將歸去
更望臨時莫洗園

守居園池雜題 三十首

湖橋

飛橋架橫湖偃若長虹卧自問一日中往來凡幾過

橫橋

長湖直東西漾漾承守寢一望見荷花天機織雲錦

書軒

清泉繞庭除綠篠映軒檻坐此何可為惟宜弄鉛槧

冰池

日暮池已冰翩翩下鳧鷖不怕池中寒便於冰上宿

竹塢

文石間蒼苔相引入深塢
莫撼青琅玕舞時露如雨
菡萏軒

朝陽媚秋漪菡萏隔深竹
誰開翠錦障無限點銀燭

茶藤洞

柔條綴繁英擁架若深洞
是處欲清香憑風為持送

箕箒谷

千輿翠羽蓋萬騎綠沈槍
定有葛陂種不知何處藏

金橙逕

金橙實佳果不為土人重上苑聞未多誰能為移種

荻浦

枯荻饒霜風暮寒聲索索無限有微禽捉之宿如客

蓼嶼

孤嶼紅蓼深清波照寒影時有雙鷺鷥飛來作佳景

望雲樓

巴山樓之東秦嶺樓之北樓上捲簾時滿樓雲一色

待月臺

城端築層臺木杪轉深路常此候明月上到天心去

二樂榭

晏山孰云靜漢水亦非動二見因妄生仁智何常用

天漢臺

北岸亭館衆最先登此臺臺高望羣峯萬里雲崔嵬

吏隱亭

竹籬如雞栖茅屋類蝸殼靜几默如禪往來人不覺

霜筠亭

危亭入幽深正在脩篁裏坐久寒逼人暫來須索起

澗泉亭

逕源分澗水滾滾出亭下橫湖能許深日夜見傾瀉

無言亭

誰此設嬾床頗稱我衰墮公事凡少休須來默然坐

露香亭

宿露濛曉花婀娜清香發隨風入懷袖累日不消歇

涵虛亭

石磴抱城回入竹見虛檻前望佳景多倚筇聊此暫
溪光亭

橫湖決餘波瀲灩瀉寒溜日影上高林清光動牕牖
過溪亭

小舟過清溪有亭纔四柱地僻少人行翩翩下鷗鷺
楔亭

懸流效曲水上已娛嘉賓飲罷已陳迹邨復山陰人

南園

農桑乘曉日凌亂如碧油紫椹熟未熟但聞黃栗留

北園

春風有多少盡入使君家當與郡人樂滿園桃李花

寒蘆港

落月照冰湖曉氣何太爽兩岸雪煙昏鳧鷖出深港

野人廬

蕭條野人廬籬巷雜蓬葦每一過衝門歸心為之起

披錦亭

繁紅層若雲密綠壘如浪青帝下尋春滿園開步障
此君庵

叢筠裏園欄淨影碧如水誰識愛君心過橋先到此
湖上衆禽盡以俗呼為題 五首

淘河

羣魚見新晴萬鬣戲清泚忽爾下淘河驚回入水底
連點七

翩翩彼珍禽金羽耀寒日飛落灘上水對人連點七

拖白練

盤石坐深林不欲入求見隔岸誰品絃數聲拖白練

泥滑滑

春日正晴明滿園花盛發勸爾竹木雞莫啼泥滑滑

提葫蘆

花開已堪摘酒熟正好沽山禽會人意勸我提葫蘆

詠蓮

全紅開似鏡半綠卷如盃誰為回風力清香滿面來

題友人書齋新壁

彩洈縱橫設雕厨次第開須防何法盛直入此中來

張淨琬

驃騎極豪侈後房多艷姬可憐張淨琬不識半酣時

待雪

向晚欲雪天氣陰木葉亂飛雜歸禽城頭徙倚待飄灑
東北萬里皆雲林

丹淵集卷十五

欽定四庫全書蒼要卷一萬四千八百四

某部

丹淵集卷十六

宋 文同 撰

詩四十七首

送提刑司勳

同昔分符守興元公始杖節來武信因而出入在門下
未有三日不親近臺移希疎獄讞少凜凜清風滿牆仞
乘閒每許陪後乘好寺名園遍遊盡惟攜茶具賞幽絕

新勝珍團曾不吝或因議事閱書畫止用小肴并淺醞
清歡雅興自無厭妓樂喧煩誰願進開張曾懷脫羈檢
顏色何嘗形喜愠使威歛霽官况樂暫過二年如一瞬
後同先滿去涪上數月復來為屬郡再將厚蔭蒙舊物
掩蔽不才寬責問同常自念性偏僻凡取交游最精慎
雖然衆中事况愛仁者與親餘不認生平所得無幾人
既已得之心自信公家兄弟何磊落一一光華如美瑾
顧同質狀似頑石輒遷其間襲溫潤今昆強季沒已久

公獨康莊馳馭駿朝廷要人辦繁劇昨下詔書催入覲
連城衆口惜公去不問鯢鮓與鬻亂煙開漢沔曉光薄
雪下褒斜寒力峻嗟同不得送行旆回視胷間綰雙印
瀟城西北有危樓徒望高鴻寄長韻

翡翠

清晨有珍禽翩翩下魚梁其形不盈握毛羽鮮且光天
人裁碧霞為爾縫衣裳晶熒炫我目非世之青黃愛之
坐良久常恐瞥爾翔忽然投清漪得食如針鏗如是者

三四厭飫已一肮既飽且自嬉
翻身度回塘飛鳴逐佳
匹相和音琅琅是時鳧與鴈
狼藉島嶼旁滿腹釀腥穢
紛紛曬晴陽鷺鷥最麤惡
背大脚脛長入水捕蛇鱖
淤泥亦啣將想其見爾時
一啄亦爾傷其心肯謂爾
被體凝華章勸爾慎所止
好醜難同鄉清溪多纖鱗
亦足充爾腸江海深且濶
所獲未可量爾當事澡刷
帝園參鸞凰

平阿馬上依韻和圖南已下共五首

江山相引轉平臯
滿馬詩情擁敝袍
鳴鶴不知誰使怨
飛鳶何謂爾能高
嵩頭亂木森如戟
澗下繁雲涌似濤
才到郵亭便沈思
向來佳景待吾曹

過朝天嶺

雙壁相參萬木深
馬前猿鳥亦難尋
雲容杳杳斷鴻意
風色蕭蕭行客心
山若畫屏隨峽勢
水如衣帶轉巖陰
生平來往成何事
且倚鈎欄擁鼻吟

晚泊金牛

一襟初覺晚霜清
短鞵垂頭任馬行
斜日歛回疎木影
急風收斷落泉聲
望窮好景番番別
題徧新詩闕闕精
終是教人伏潘令
許多才調賦西征

金牛相別呈誠之

出門相與望橫參
露浥幘頭冷逼簷
驛在金堆隨澗遠
路經銅冶入煙深
過橋住馬應回首
上嶺聞猿想動心
勝事莫過文酒樂
此時銷得各沈吟

大桃途次見菊

英英寒菊犯清霜來伴山中草木黃不趁盛時隨衆卉
自甘深處作孤芳其他爛熳非真色惟此氤氳是正香
却念白衣誰送酒滿籬高興憶吾鄉

弄珠亭下柳

江柳早春前濛濛弄紫煙未容長作帶已見亂飛綿遠
外分晴島深中泊暮船惟應漢水色奈爾一年年

弄珠亭春日閒望

弄珠亭上客來想弄珠人野草迷晴岸垂楊暗晚津天

涯羈旅地村落寂寥春何處
皤然叟扁舟下釣綸

寄子駿運使

時按西鄉

西鄉巴嶺下嶮道入孱顏
使騎到荒驛野禽啼亂山
問民青靄裏訪古白雲間
幾日南城路新詩滿軸還

寄景孺提刑

江由崑嶮地萬木與雲齊
弭節山中宿思歸夜半啼
麝香霑野草虎跡滑春泥
到此須憑酒何人手可携

公館

公館晝沈沈煙雲晚作陰琴軒冰沼淨書閣火爐深
默坐自有得閒行誰可尋還應上高閣看雪一千岑

衰晚

衰晚得洋川勞生只自憐文移供盡日心力付流年
咄空書字便便足晝眠其如昏嫁在了即賦歸田

欲雪

山城蔽層陰晚照空外滅天低雲氣暖此意欲作雪
歸鷗煙慘澹斷鴈風蕭屑樽酒聊自持同誰感時節

晴山

東北橫羣峰新過夜來雨扶空立屏障浩翠小萬古豈
無短齒履攜手誰我侶欲往殊未能

舊集闕末句

臨漢亭

危亭俯絕岸漢水望天表遙源瀉金穴高浪灌朱鳥紆
餘轉荆楚萬里合浩渺誰知嶓冢下悻然如帶小

雪中三章寄景孺提刑

城頭高榭陟嶙峋坐看江郊灑玉塵恨不同來對清絕

擬將佳景待何人

晚雪湖上寄景孺

朔風吹雪滿橫湖，衆鳥歸棲日欲晡。獨坐水軒人不到，

滿林如挂暝禽圖。

暝禽圖景孺所藏之奇畫也。

齋宮

玉龍噴霧碧霏霏，鈿枕珠衾照百枝。自與侍書人一處，此中全不管岷之。

詠柳二首

風外挂簾誇軟甚雨中盤砌奈長何一般草木緣何事
聽唱驪駒爾最多

其二

綠蛾綠條立春後金蛹抱花寒食前行人折罷自欲去
更冒長梢留客鞭

郡齋水閣閑書

六言

湖上

湖上雙禽泛泛橋邊細柳垂垂日午亭中無事使君來

此吟詩

獨坐

不報門前賓客已收案上文書獨坐水邊林下宛如故
里閒居

湖橋

湖橋北頰花塢水閣西頭竹村霏霏薄霧紅暖漠漠輕
烟翠昏

推琴

點點新萍帖水濛濛亂絮縈風盡日推琴默坐有人池
上亭中

靜觀

十許紋魚弄水一雙花鴨眠沙靜觀只恐鷺去無語憑
欄日斜

亭館

亭館脩脩度日園林寂寂經春且遮新笋誇客莫掃殘
花悶人

流水

四首秦僧絕論一篇楚客離騷讀罷却彈流水先生此
興尤高

報國

報國無忘竭節居官勿用論功莫問啞啞趨樂不煩吐
吐書空

聞道

聞道幸非曲士讀書甘作陳人為文自怪逆俗好畫誰

知入神

相如

相如何必稱病靖節奚須去官就下其誰不許如愚是處皆安

彭澤

彭澤先生未去武陵太守常貧上官幸且容已下鬼休來笑人

憑几

列傳日逢佳士羣書時得微言自對古人憑几不煩俗
客登門

哀後

哀後常親藥餌憂來頗憶林泉身坐謝莊小閣心游沈
約東田

自悟

自悟空王理勝因知辨士辭窮但了一忘六解休論四
異三同

鷺鷥

避雨竹間點點迎風柳下翻翻靜
依寒蓼如畫獨立晴
沙可憐

蓮子

綠實填房未滿黃茸繞殼方
開為問因誰勸酒一時齊
側金盃

采蓮

岸幘客來橋上濺
裙人在湖中桂楫
蘭橈甚處蓮花荷

葉無窮

翡翠

見諸長喙須避得少纖鱗便飛為報休來近岸有人愛
汝毛衣

朱槿

含露方矜香裊搖風旋見離披湖上先生笑汝朝開暮
落何為

青鶴

常惡靜時鳧鷺不驚飽處鰕魚與吾閒正相似問爾樂復何如

車軒

平湖靜處朱閣垂柳深中畫橋隱几香烟露濕投竿衣帶風飄

偶書

犢去食苗莫問烏來攫肉休知物須以信相感事忌於心有為

北岸

曲榭紅蕖影上圓
庵綠篠陰中門外
何人會畫故來寫
作屏風

自詠

看畫亭中默坐吟
詩岸上微行人謂
偷閒太守自呼竊
祿先生

再贈鷺鷥

頸若瓊鉤淺曲頭
如珀管深翹湖上
水禽無數其誰似

汝風標

閑書

逐出堪羞子溥歸來可重淵明試問七松處士何如五
柳先生

丹淵集卷十六

謹案卷十三第五頁後一行神鶴當歸墮玉毛刊
本墮訛隨今改

第八頁後一行臺殿曖曖山嶽堯刊本嶽堯訛堯
堯今改

卷十四第四頁後七行一匝清波流珠子刊本珠
子訛子子據宋詩鈔改

第七頁前二行解帶緩幽憂刊本緩訛緩今改
卷十五第一頁前七行落落巖畔松刊本畔訛游

今改

第四頁前三行上馬退岸幘刊本幘訛情今改

卷十六第三頁後五行出門相與望刊本門訛則

今改

總校官庶吉士臣侍朝

校對官編修臣閔惇大

瞻錄監生臣任益春

欽定四庫全書薈要

集部

丹淵集卷

十七至
二十

詳校官助教臣常循



欽定四庫全書薈要卷一萬四千八百五

集部

丹淵集卷十七

宋 文同 撰

詩五十二首

往年寄子平

往年記得歸在京日日訪子來
西城雖然對坐兩寂寞
亦有大笑時相轟顧子心力苦
未老猶弄故態如狂生
書窻畫壁恣掀倒脫帽褫帶隨
縱橫誼歌詩詔文字

蕩突不管鄰人驚更呼老卒立臺下使抱短簫吹月明
清歡居此僅數月夜夜放去常三更別來七年在鄉里
已忝三度移雙旌今茲昏昏意思倦加以跼跼疾病嬰
每思此樂一絕後更不逢人如夜行

贈日新禪師

蕉堯祝融峯竄窳懶瓚巖師也西南人嘗居彼巉巉十
年不下山煙雲爛衣衫借問爾何為法味見愈饒妄萌
將軋然即以慧刃芟既久闢門戶不須更封緘龍神護

水併鬼物扶經函壘足坐蒼石放身依古杉一日望劍
門歸心瞥如帆過我畫戟前清晨投短銜欣然揖師坐
未語已不凡再勘自不破誰敢分酸鹹大朴本無痕巧
者強削剗師如捉龜拂定不空誦誦

送竇僉判同年

冰霜滿清漢此地送君歸天涯作遠別懷抱殊依依短
亭臨灑水楊柳長條稀道傍有寒梅幽香撲人衣折以
持贈君愛之令春暉酒罷不可留晚鴻隨馬飛

拙詩六韻奉寄興州分判誠之蒲兄

武興山水郡左右有佳處仙巖蟬兩殼

何賈二真人

佛宇玉

一柱神坑孕金礫

宜口金穴

靈竇洩瓊乳乳柱石窟寺不辨

文字古主人好事者乃我詩酒侶安得陪後乘放蕩此
歷觀

依韻和蒲誠之春日即事

輕烟漠漠雨斜斜無事常教放兩衙問客江邊求好石
倩人山裏覓奇花新蔬宛宛生晴圃淺溜涓涓出暖沙

入夏盃盤須准備繞畦親灌邵平瓜

和提刑子功喜雨

時雨已可喜况當春發生入地如流膏浸灌萬物萌真
宰每自惜纔灑復却晴常時稍霑濕庶景亦已榮昨宵
忽盛下欄宇翻瓶罌高原與庠陸旦可一尺盈尋觀太
陽起紅光吐崢嶸萬里洗氛濁四顧蒼煙平羣農悉就
野上下羅晨耕父老荷鋤鍾林間笑相迎盡言此美澤
天意恤下吐麻麥固已定預見禾黍成且幸賦輸辦敢

望求他羸次第還與官口腹甘別營願常獲豐稔自覺
所取輕言罷乃散去溝壟紛縱橫使者有職事其喜誰
與并高齋聽淙淙不寐達五更豈不省文移賴此一夕
傾天明作浩歌滿紙編和聲

謝夏文州寄金線狨

天地生竒獸朝廷寵近臣覆鞍須用此投網為何人梨
栗恩雖厚雲山夢想頻煩君遠相惠時為一沾巾

依韻和子駿雪山圖

一甲溪山六幅中其間雪意與雲容君應記得飛仙下
颺馭亭前此數峰

此樂

吏散收簿書公館如山居歸來換野服携策將馬如園
亭極瀟灑陰森脩竹下拂石坐終日徙倚不知夜山月
照我明林風吹我清口誦太古文往來池上行露下覺
微凜南窓歸就枕心閒神自安達旦得酣寢亂曰嬾守
余何為日日常若斯為言我自爾此樂非汝知

百舌鳥

衆禽乘春喉吻生滿林無限啼新晴南園花木正繁盛
小小大大皆來鳴藏枝映葉復誰使不肯停住常嚶嚶
就中百舌最無謂滿口學盡羣鳥聲自無一語出於已
徒爾嘲啞誇從橫朝朝泊我高柳上叫破一牕殘月明
幽人穩睡正酣美無計可奈遭爾驚少年挾彈彼誰者
安得為我來五更

莫掃花

莫掃花從教花滿地縱然堆積亦何害留之且重東君
意君不見昨朝枝上正芳菲今日庭前已憔悴中間得
好能幾時用此請君窮物理一榮一謝兩皆空若了非
真本自同但對落英開酒盞每年如此任春風

詠竹一字至十字成章

竹竹森寒潔綠湘江濱渭水曲帷幔翠錦戈矛蒼玉心
虛異衆草節勁踰凡木化龍枝入仙陂呼鳳律鳴神谷
月娥巾帔靜苒苒風神笙竽清簌簌林間飲酒碎影搖

罇石上圍碁輕陰覆局屈大夫逐去徒悅椒蘭陶先生
歸來但尋松菊若論檀藥之操無敵於君欲圖瀟灑之
姿莫賢於僕

詠石

石石陰黑陽白岸胚胎山骨骼天地鎔鑄鬼神刻畫鯤
鯢張怒眼虎兕交鬪額敲如溫玉聲清洗似精銅色碧
花邊瓦爾盡竒品林下礪然無俗格冰霜慘冽堅操不
移塵土昏冥孤標自隔堯矼獨立見到侍中家石砢落羣

居在牛丞相宅昔時大士常命汝曰聽徒今日衰翁且
對君為佳客

深渡

前日寒食在綿州牡丹盛開海棠落今已逾旬過深渡
山桃一枝橫曉閣此花平川最為早何乃於此才破萼
化工豈爾用功偏蓋爾所生居絕壑一年春事但自了
勿較後先嗟寂寞

嘉川

嘉川之西過新棧幾里朱欄繞青壁我行落月尚在水
水影照人襟袖白繁英雜綴脩蔓上綠錦纈帶垂百尺
清香滿馬去未休賴爾春風慰行客

青烏

青烏客館之東軒前對長江隔層嶂歎危一徑入林外
竹柵茅簷儼相向愛其生事亦自足牛羊縱橫雞犬放
安得與爾號比鄰為作野歌供吹唱

木瓜園

驅馬下高崗吟鞭只自揚溪山過新霽草木發清香浩
蕩來江闊縈紆去棧長春風去欲盡樽酒歎何嘗

長舉

山色滿西閣到江知幾層峯巒李成似澗谷范寬能澗
外晴煙落深中晚靄凝無由畫竒絕已下更重登

水磴

激水為磴嘉陵民構高穴深良苦辛十里之間凡共此
麥入麵出無虛人彼吐居險所產薄世世食此江之濱

朝廷遣使興水利嗟爾平輪與側輪

長舉驛樓

爽氣浮空紫翠濃隔江無限有奇峯君如要識營丘畫
請看東頭第五重

正月八日峽中新花

深碧長條淺紫芽曉叢無數傲霜華只應耻在江梅後
未著葉時先放花

贈淘金叟

濯石淋沙不自勞，挾光挑屑甚么磨。世間有客能祛篋，
比爾元來得校多。

過青泥

鐵山正月雪交加，欲探東風未有涯。纔過青泥春便好，
水邊林下見梅花。

過大散寄子駿

纔過嘉陵心自喜，歸來一夜寫君書。明朝便送曾冰底，
定有西行雙鯉魚。

飛仙石溪

愛此潺湲任濺衣，獨尋幽石坐多時。
日斜徒御應相笑，底事教公上馬遲。

籌筆諸峯

君看籌筆驛江邊，翠壁蒼崖起晝烟。
正是峽中佳絕處，土人休用作畬田。

柳池贈丁綢

場屋聲名四十年，五車書誤一囊錢。
老來山驛為監吏。

相對春風但惘然

偶題

鬢雲雙墮結明珠
窄窄羅裙短短襦
閒把花枝起新樣
滿調金粉畫文輸

天漢橋

風吹兩岸菰蒲乾
日曬一汀鳧鷖寒
夜深霜月照湖水
須上此橋憑畫欄

望雲樓

南山北嶺遠如層朝雲暮雨濃若蒸樓高百尺見萬里
更有底事須來登

灑泉亭

竹列蒼戟枝幹稠亭開翠幄窻戶幽下分灑水入渠口
正坐小榻臨清流

此君庵

斑斑墮籜開新筠粉光璀璨香氣氤我常愛君此默坐
勝見無限尋常人

二樂榭

旻山北來聳峨峨漢水東下流滔滔開軒直可望百里
最愛此榭凌雲高

漫郎亭

鑿城為洞深且長沿壕開逕閑復荒有亭如許入蒙密
誰比次山稱漫郎

涵虛亭

雲外衆峰蒼際橫竹間飛泉窻下鳴欲往二樂即歇此

留懷已自如冰清

菡萏亭

日高過竹湖水光風長入座荷花香交紅映綠滿渠下
各有意態隨低昂

竹筥畬谷

池通一谷波溶溶竹合兩岸煙濛濛尋幽直去景漸野
宛爾不似在塵中

王氏北溪崇州

石龜州北羣峰起一去距城無十里煙嵐秀氣護巖扃
松菊清香泛溪水輕裘肥馬正榮耀春韭秋菘任凋毀
待將底物勒移文谷口濃雲白如紙

雋老水墨

之人渤海後所尚亦瀟灑不承春秋學乃好水墨畫鷺
溪吾鄉里有絹滑如研君凡幾多筆為我禿數把

李堅甫淨居雜題一十三首

并序

堅甫既得請太平宮遂於長安里第營治亭

館為逍遙種種之樂已而作詩十三篇遠來見寄且使余亦為之余愛其趣尚清遠因以累句附其所題之末慙非精工聊以塞命云爾

何事當清世歸來詠考槃近聞新住處不似在長安

右靜居

米鹽辭劇務宮觀得清資自取閒官樂爭教俗客知

右靜叟

將何寫幽意有此古桐聲為問好彈處誰來聽鱗行

右琴室

身閒無可奈惟此度晨昏與客正爭局問誰休叩門

右碁室

縑緗羅几格無限有奇書想在中間坐渾如獺祭魚

見義

山別錄

右書

試品齋中畫曾無第二流頑礪與亂篠應挂在當頭

二畫

余之筆因戲及之

右畫齋

日光明駘蕩天氣暖氤氳草木徧庭檻清香朝暮聞

右春軒

清飈動蕭瑟翠樾減婆婆却愛夜來月滿窓寒影多

右秋軒

鐵石枝梢勁冰霜節目圓淨搖風苒苒間映月娟娟

右竹軒

翠羽攢柯密青丸綴實繁誰知人與木俱是太清孫

右檜軒

寒溜日涓涓縈紆小檻前不知明月下誰與弄潺湲

右水亭

未老先求退題庵乃自呼有才須進用能保此名無

右退庵

淨居都葺了餘地蓋斯堂不用栽萱草無憂可得忘

右北堂

丹淵集卷十七

欽定四庫全書薈要卷一萬四千八百六

集部

丹淵集卷十八

宋 文同 撰

詩五十六首

晉銘

長安鬻碑者遺我古鼎銘不知其所來有眼實未經凡
百十九字詭怪摹物形縱橫下點畫不類子與丁試考
諸傳說其源已冥冥宣王石鼓文氣韻殊飄零始皇嶧

山碑骨骼何矜辨我恐鬼哭時正為此物靈安得不死神提去詢大庭為我譯其辭讀之駭羣聽

秦詔

山流濯幽阮銅篆發古耀我行奉天縣叟以百錢糶讀之迺二世元年所刻詔謂法度量者盡始皇帝造辭止曰皇帝久遠若為道乃命斯去疾具述紀其要文章既精簡字畫亦佳妙亥爾何等人敢作萬世調其為者非是所累纒一廟區區頌微末回首皆可弔郡兵厭寶玉

得此只揮掉漂流落荒壤千載厄潛奧乃知天宇內事
有不可料此物今何為惟助觀者笑

問陳彥升覓古瓦硯

魏主用死力構彼銅雀臺當時臺上瓦百澄為一坯燒
成比堅玉翠甲橫崔嵬西陵既歸後此地日以摧後歷
典午朝羣雄力相逐茲臺既已傾此瓦只自堆歲久岸
谷變埋沒深蒿萊初誰得耕人剗之研松煤其理密且
潤端歛真可啗彥深所有者一一皆珍材自言欲購時

經歲無一枚琴紋與錫花此乃如瓊瑰前日秘閣下重
匣手自開示我者佳絕恰用一樸裁形模甚古野用可
資怪魁歸來作詩乞願致無遲回

謝楊侍讀惠端溪紫石硯

學文二十年語氣殊未成所以文房中四譜無一精豈
不願收貯恐竊好事名自愧中槁然敢假外物榮前日
下秘閣謁公來西城公常顧遇厚待以為墨卿延之吐
佳論出口無雜聲語次座上物硯有紫石英云在嶺使

得渠常美其評因取手自封見授囑所擊倉皇捧以拜
其喜懷抱盈歸來示家人衆目歡且驚言並我所有瓦
礫而瑤瓊貴價市珍煤風前試寒泓磨知密理潤點覺
浮光清洗濯鑑面瑩彈扣牙音鏗遂剪十龍巾加以重
篋盛客來有欲觀稍俗不敢呈願傳之子孫更重金滿
簞觴作詩叙嘉貺慙比毫毛輕

西岡僦居

出官在秦蜀始末凡十年所治得公宇靡不完且堅中

堂與挾廊角翼相鈎聯領屬僅十口出處皆安便冬夏
惡風日侵薄曾無緣今年歸中都職事叨磨鉛未免儻
屋住敢謂須華鮮西岡頗幽僻愛此遠市廛問得王氏
居十楹月四千床榻案几外空處無一椽區溷及井竈
圻壁皆相連經庫須俛首過隘常側肩所謂十口者曰
繞蝸殼旋前時大暑中幾不禁禱延鬱若鼎釜炊局如
狴犴孿走蝸過亂蟻飛蚊劇羣蟬今日幸過之復畏明
日然喜見白露節相賀肌肉全如何下淫雨曉夕常綿

綿瓦破椽棟漏柱陷墻垣穿惟供改席坐豈暇安枕眠
中庭止數步深已可載船盡室徒跣行一起復一顛京
師費耗地居止實重遷俸料計月入外得無幾錢却思
已過分僅免親犁田自望於古人若地而升天小廬焦
生高陋巷顏子賢引之諭妻孥吾道宜此焉猶勝比隣
者寒突無晨煙

閔鄉值風

烈風吹華陰古槐若長呼高沙起黃磧四望如一鋪上

馬低便面據鞍兀長途日晚過潼關行客亦已疎守吏
索姓名沸亂如蟲蛆兩目不可開說之使自書夜至閔
鄉縣僮僕相欵欵坐定即洗濯泥土捫短鬚草草具盤
殮零落飯與蔬恨無妻少府為膾黃河魚

積雨

京師值積雨浮淖皆滿城况當洶決時左右羅深坑有
客南河居旦夕隄上行病僕挾羸馬十步八九傾職事
有出入長抱落膽驚都人素豪恣小官常見輕排闥要

穩道歛避不敢爭試欲效呵止園目根姓名往往被濺
汚直落舌與睛歸來事洗濯袍袴紛縱橫仰首問天公
春澤當早晴幸有好日月何惜施光明

大熱過散關因寄里中友人

六月日正午大暑若沸鑊時行古關道十步九立脚煙
雲炙盡散樹木曬欲落喉鼻喘不接齒舌津屢涸擔血
僮領鞍汗馬濡膊幽坑困猿狖密莽渴鳥雀至此因
自謂胡為就名縛所利緣底物奔走冒炎惡塵心日夜

迫欲住不能略因念吾故園左右悉林薄昔我未第時
此有文酒樂長松借高蔭飛瀑與清濯層崖對僧詠大
石引客酌畏景雖赫然無由此流爍于今只夢想欲往
途路邈所效殊未立期歸尚誰約徒爾發短歌回首謝
巖壑

問景遜借梅聖俞詩卷

前日讀子詩快我煩病軀若坐大暑中瓊杯飲琳腴辭
嚴意清絕敢謂人所無子乃不自高尚爾尊聖俞為我

誦佳句實亦郊島徒遂云有家藏兩軸如椽麤我方嗜
此學常恨失所趨願子少假之使之識夷途

秋居覽景因感所事

閒居閉窮巷拙者誠所宜掩書坐前楹默與天理期是
時新雨收物物含秋姿疎簷正殘日曲几方涼颺羣雀
下空階逐逐顧且隨微蟲出幽隙繞繞行復飛疎篁挺
堅勁不並草木哀叢蘭吐芬芳豈畏霜露知觀此動與
植一一全天資因念物稟生有性各異持夫人為靈者

仁義實所尸胡為智巧後所有日夜隳不能保其元妄
事紛擾為汲汲以就死所耗無纖釐還本既不完何用
冠且衣余因激所遇攬筆成此詩庶幾學者心讀已而
悟茲

彥思示望南山詩因答

余於岐雍間屢走官道上終南百里近不得迂馬訪徒
常飫雙眼引首旦夕望羣巒突天起氣勢頗豪王余名
愛山者所見亦無量嵩華最魁傑詩之豈曾讓至此覺

才弱不敢輒名狀世謂秦土強捨是孰為壯彥思竒偉
士雅志同所尚近自山中來滿幅以詩貺凡是山勝絕
鉤胃付心匠驅聯以大語局度實奔放豁若展圖畫壓
紙千萬嶂讀之未云徹早自肝膽喪試欲効其說無迹
可依傍坐見山所有已若一携杖何當俯清渭解帶濯
塵埃掉手入巖谷琴樽樂幽曠浩漭八極大冥心恣飄
颺此意殊未諧臨風一悽愴

嘲中條

荆山赴太華百萬如走駝
觜尾不相殊前後翻海波
既至擁而蹲仰首爭列羅
太華勢愈尊引手欲下摩
中條從北來亦願依魏峨
豈知隊伍弱只類馬與羸
奔騰氣力盡羣伏飲大河
飲已只南望岌然將奈何

寄題威勝軍守居高明榭

石侯守銅鞮暑居念煩愀
營基切城角列礎出樹杪
窻橫四野外轉目可俱了
長風落霄極萬里吹縹緲
主人白羽扇日日上清曉
琴樽嘯佳侶以樂軍事少
晴煙抹

闌闌暮角送禽鳥語客莫遽歸前林月將皎

仙禽送景遜赴階州監稅

肅肅彼靈羽英英下瑤臺揚翹俗采暗振響仙籟回凡
鳥只歛避衆人亦驚猜羅以萬目網離以雙翼摧十載
困塵土一身伏蒿萊晦色不敢耀藏音豈能哀飢腸金
屑實渴吻瓊漿開俛首事澡刷一飛遊九垓

送呂希彥司門通判河陽

行父須生公相家脩潔不類在紈綺豈惟浩蕩愛古學

實亦縱橫曉時事孟州之民爾何幸一旦得此賢半刺
定知未幾政清簡日日案頭詩滿紙河陽花開酒休泥
太行雲飛樓好倚若因行縣至盤谷為訪其間隱君子

送周介之學士通判定州

紫垣之東蕃羣宇合四翼天家積圖史編簡何萬億介
之才藝選此地典文墨縱橫四部內騁驟千古力久為
光祿校頗倦承明直嘗言石渠樹五見弄春色前自啓
君相得請均外職翩然駕別乘去云大河北

又

河北扼邊要定武承其咽分道宿勁兵望之為中權朝
廷倚注地擇用須材賢黠獫豸所聞射獵不敢邊茲焉
勢愈重豈謂甲馬然將軍廟堂老御史蓬瀛仙合謀運
潛略勝氣壓古燕惟當陪緩帶壺觴鈴閣前

送柳才僉判蔡州

翩翩河東孫豪邁有祖德二十補楚掾能用口破賊歸
來入京寺不借推挽力驕夸固其宜了不見顏色題輿

蓋本乘入幕乃屈職淮西號劇府君也茲歛翼朝廷選材吏聞下前日勅奉詔者云誰此章君可塞

送張宗益工部知相州

學術深沉久未施晚登臺省世方知詩章好奏周文廟
字法宜摩魏武碑禁掖便當提大筆名藩猶自擁高麾
應憐共試金坡者答颯渾如鄭鮮之

送王恪司門知絳州

絳守園池天下誇紹述有記詞聲牙蒼官青士左右樹

神君仙人高下花遠水依然尚鈎帶舊門想已無鞞槓
自憐俗狀不能到此去羨君專宴衙

送蒲霖中舍致仕歸閬中

急趨長拜倦勞勞自笑風埃滿綠袍官味十年如水薄
歸心一日共雲高毫釐已悟蝸爭角文彩須知鳳得毛
且喜還家收拾在錦屏山下舊東臯

送劉立之著作歸長安因赴安定知縣

西郊晴霧曉霏霏回首京塵一拂衣上國莫嗟為客久

高堂初喜改官歸洛城氣候花纔動灞水風光絮絮恰飛
恨不同遊曲江岸與將歌酒泥春暉

送張正夫監簿歸漢州

知己非不過其如才命違宦名疑在夢親祿只徒歸道
路盤危棧家山指落暉好將綿竹頌重拂入關衣

潞公門客

奏不
出官

新霜

新霜著庭樹葉下如猛剝蕭然物容改有若懼凌挫砌

下丹橘落牆邊紫榴破精光竹勁健沮喪柳怯懦覽景
惜向暮感時驚忽過勝事實可樂間愁本堪唾何當共
佳客對此酌香糯

答馬子山節推見寄

曾陪參畫從橐鞬文雅當時最盛傳玉挂好風橫飲簞
翠漪明月漾吟船石渠金馬余何者綠水紅蓮子尚然
好養江邊鴻漸翼詔書非久下菑川

紅樹

萬葉驚風盡卷收，獨餘紅樹擬禁秋。
已疑斷燒生前嶺，更共殘霞入遠樓。
楓岸最深霜未落，柿園渾變雨初休。
勸君莫上青山道，粧點行人分外愁。

彥思惠楹棹因謝

秦中物專美，楹棹為嘉果。
南枝種府署，高樹立婀娜。
秋來放新實，照日垂萬顆。
中滋甘醴釀，外飾素茸裹。
彥思摘晨露，滿合持贈我。
復侑以佳句，再拜極所荷。
珍之不敢盡玩已，即深鎖茲焉遂。
名產沙苑忽么麼。

彦思有北樓見寄之作依韻和答

峩峩守居城上樓最宜登覽羣物秋層簷高塞礙翠嶺
采檻直出橫清流煙中島嶼遠歷歷風外巖壑寒颼颼
主人好事客意樂日夕幸此忘幽憂

閒居秋日書事

秋雨晚蕭蕭端居閒寂寥雀饑爭朽穗蟬病落寒條雲
過茶煙沒風歸硯水搖惟當昵圖史閒日底能消

寄題湖州沈秀才天隱樓

自念久不偶歸老東南州地名水晶宮家有天隱樓收
捲勢利心欲與汗漫遊出處固以義無為子光羞

酬仲幾秦州道上見寄

送子入秦處紛紛黃葉間孤舟渡野水匹馬轉遙山明
月每夜望清風何日還新詩慰牢落為一破愁顏

入谷馬上四首

宛轉入深谷一林還一丘搖鞭弄新霽把筆韻高秋翠
巘雲長合寒潭烟自浮因成憶猿鶴聊此為遲留

其二

亂竹圍清密垂蘿蔭屈盤晴林風色淡晚水日光寒樹
石因誰好烟雲只自漫羣峰若相待滿眼碧巒岿

其三

北谷氣象佳有景乃天設峯巒互虧蔽湍瀨相綰結珍
條拂垂袂芳草留去轍自顧塵滿纓安能住深絕

其四

羣山護秦隴轉去轉幽深嵐氣重壓眼秋光清徹心憑

鞍吟絕壁解帶坐高林愛此嵩泉好臨流浣俗襟

將至隴城縣

數日山林間鬼眼復傾耳煩襟一以換飄若方外士今
朝出谷口已覺俗慮起可惜身上衣斑斑遂塵滓回首
林下游何年赤松子

宿雲屏山寺

翠嶺聳雲端巉巉走復蟠客從塵外入僧向畫中看月
上千巖碧風生萬木寒平明惜歸去猶待一憑欄

寒夜

蜀客寓秦城，寒威怯夜生。
火床功甚小，酒榼力何輕。
月外天無色，霜中地有聲。
王章龍具薄，數徹郡樓更。

寄彥思時在長安言遊終南

日日望車馬，君當何日還。
談諧思袞袞，篇什愛關關。
大道風埃惡，長河冰雪頑。
相招早來此，擬欲問南山。

寄景遜

別後西城上來，須到日曛目迎。
秦塞鴈心過隴山，雲寡

合無如我高懷少似君相思只相望徒爾託云云

聽天台處士彈琴

處士得琴要誰師師自然為言秋思好因聽夜聲圓耳
出淫哇外心搖寂寞前廣陵君且止不欲慢商絃

鳴玉亭籌筆之南

層崖高百尺亭即層崖下飛泉若環珮萬縷當簷瀉坐
可脫赤熱聽宜徹清夜亭前樹膚剝為繫行人馬

思歸鳥左右掩作

峽中足啼鳥，酸鄒不可會。共道思歸者，雄鳴即雌對。前
壑雲漸起，後山月已背。行人畏聞汝一聲，一心碎。

夜發散關

風吹古關口，萬木響如裂。淒涼異鄉客，騎馬關下月。板
道霜鑿鑿，石梁溪咽咽。怪來曉寒重，却愛山頭雪。

宿山寺

高峯浮雲際，古寺高峰上。秋來已瀟灑，雨後益清曠。坐
隨明月轉，吟伴寒蛩響。待曉出松關，幽襟謝嘉貺。

中秋月二首

隔林艷艷生寒浪倚漢岩岩數亂峯記得舊山曾此夕
碧嵒千尺坐高松

又

望外物容澄似水坐中秋力凜如刀此身直願乘雙翼
飛上三峯第一高

二里溪濯足

暑氣沈晚樹晴光滿遙川下馬古道側濯足清溪邊勝

事樂水石幽懷託雲烟還來振衣起回首徒悵然

稠桑見荆山

萬嶺鬱鬱叢叢盤雲氣勢雄縱橫誰畫筆屈折自屏風倒
樹出斷外亂雲生掩中無由更停馬此意恨如蓬

白鶴寺北軒圍碁

祇園隱城角開軒極幽邃日影轉不到居常抱秋氣余
茲度炎燠一局忘萬事擾擾門外人誰知此中意

太常致齋間書寺壁

晚日微明弄雨餘竹陰桐影共蕭疎旋移小榻中庭坐
讀盡扶桑大帝書

景遜以詩招基因答

待闕官期遠僑居客思多許時間日月願與局中磨

初入二里

樹色交山色蟬聲雜水聲客懷殊不倦信馬此間行

又送劉著作

北城戎馬後凋殘今幾年邊民此天幸縣令若君賢况

自儲蓄久定知摩撫全好須圖善政能為作詩傳

送張樸翁歸盤屋二首

一覺落天夢遂吟招隱詩攜家異鄉去變服散人為鄙
塢雲開後圭峰月上時清秋此高興琴酒問同誰

其二

山曲水曲處其間皆美田夫君別桑梓此地卜林泉壯
歲可立事明時方尚賢何當再就詔便忍說終焉

丹淵集卷十八